

Las sfidas dal Center da scolaziun Palottis d'Aschera

DAD ELISABETH BARDILL

■ **La radunanza generala da quest onn da l'uniun Center da scolaziun Palottis d'Aschera è sa fatschentada, sut igl presidi da la plevonessa Gisella Belleri, cun la cooperaziun e la convivenza tranter carstgauns da differenta derivanza.** Il Center Palottis d'Aschera è in lieu da scolaziun e d'en-

tupadas multifaras cun ina vasta irradiaziun. Qua vegnan fatgas punts formativas cun la purschida dal dieschavel onn da scola u cun l'onn d'emprender il lungatg, ma surtut cun promover l'integraziun. Qua vegnan organisads curs en blocs per l'onn social grischun sco era curs averts per obtegnair l'attest federal sco pura diplomada. Praticantas e praticants dal Giapun e da la Scola evange-

lica d'Aschera vegnan scolads en las enconuchientschas da basa pertutgant il tegnairchasa. I han lieu arranschaments, dietas, festivitads e curs dad organisaziuns externas che prendan a fit las localitads dal Palottis. En il curs da l'onn passà han chattà albiert en il Palottis ina gruppa da musicists da chombra ed ina squadra da gimnastas d'urdains.

Ina chasa cun bleras pussaivladads

La proviantaziun e la cuschina èn da grond'impurtanza per il bainstar en il center da scolaziun. Mintga di vegnan preparadas qua var 200 tratgas. Duas cuschinas da scolaziun ed ina cuschina gastronomica fan part da l'infrastructura multifara dal Palottis, uschia ch'i po vegnir organisà curs per cuschiniers e pasterners u ch'uniuns pon far adiever d'ina da quellas cuschinas per lur agens intents. Da dar a tschains stanzas sco er da servir giasts tutga tar las purschidas dal Palottis. En quest connex ha fatg a savair la manadra *Ursula Gebbauer* ils plans ch'ins haja en mira per l'avegnir.

Project Palottis PP 18

Pervia da l'occupaziun bassa da la chasa da dimora vuessan ins transformar la bella chasa veglia en la «Villa Palottis», che na fiss betga pli dependenta da l'occupaziun cun participants da curs, ma bain pudess vegnir dada a fit permanentain. Plinavant vuessan ins acquirir glied d'auters chantuns e surtut da las citads cun dar impuls captivants per elavurar temas da l'agricultura, da l'ambient e dal scoialesser. L'entir complex da bajetgs inclusivamain l'acla «Waiza» duai en quest rom funcziunar sco unitad.

La partiziun dal l'agricultura dal Palottis è per planisar ina butia, in café ed ina tarmagliera sin il bain puril. Ils fittadins novs *Werner e Marianne Egli*, geniturs da dus uffants pitschens, èn pronts d'adosar las grondas sfidas sper lur lavur regulara da manar il manaschi. – Il Center Palottis basegna in'adattaziun: Sco purschida da scolaziuns ed albiertament correspunda ella als basegns dal temp ed emplaina las largias pertutgant las spiertas da furmaziun actualas sco era futuras. Er sin quest champ d'affar dovri il pensar ed agir interprendist. Pertutgant il sectur economic procura l'uniun purtadra per in plan da finanzas bain ponderà.



La suprastanza da l'uniun Palottis: Ursula Gebbauer (directura), Gisella Belleri (parsura), Maria Meyer-Grass e Hans-Andrea Tarnutzer (vicepresidi) (da san.).

FOTO E. BARDILL